



Inatsisartut inatsisaat nr. 19, 30. oktober 1992-meersumi, Inatsisrullu inatsisaanni nr. 23, 18. november 2019-mi allanngortinneqarsimasoq, siunertaavorlu sukkulaanut, allanullu sukkulaartalinnut (kakaaviunngitsoq), lakridsinut, allanullu lakridsitalinnut, marcipanit allallu marcipanitallit, karamellit, milukaat, sukkuvaqqat il.il. sukkullit sukkoqanngitsullu § 1, imm. 1 nr. 2-miittunut akitsuutip peerneqarnissaa pillugu Inatsisartut aalajangiifigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

(Siullermeerneqarnera)

Qujanaq Inatsisartunut ilaasortamut Aqqalu C. Jerimiassen siunnersuuteqarnermut.

Demokraatini kissaatigaarput, innuttaasut namminneq aningaasaatiminnik annertunerusumik tigumminiinnarnissaat, kissaatigalugulu, innuttaasut pisisinnaassusaasa pitsaanerulernissaat. Tamanna qularutigineqassanngilaq.

Sunali tamaat ataatsimut isigisariaqarparput. Akileraariaaserput- akitsuuseeriaaserpullu ima ilusilertariaqarparput innuttaasunut naapertuilluarnerpaamik aammalu pisariitsumik akunnaatsumillu paasineqarsinnaallunilu atorineqarsinnaasumik. Tassunga atatillugu uagutsinnut pingaartuuvoq erseqqissassallugu, Naalakkersuisut akileraartarnermut- aamma akitsuusersuinermut aaqqissusseqqiineranut peqataannginnatta, angusaqarusussuseqanngippallaaqimmat. Taanna aaqqissusseqqiinermik taanilik kaasarfimmiit kaasarfimmut allamut nuussinerinnaavoq. Annertunerusunik angusaqarusussuseqartariaqarpugut.

Uuminnga siunnersuuteqarnermini Inatsisartunut ilaasortap Aqqalu C, Jerimiassen-ip mamakujuttunut akitsuutip peernissaa kissaatigaa. Isumaqatigaarput, akitsuut qaffasippallaartoq apparneqartariaqartorlu. Oqareernitsituullu allatut ajornartumik ataaatsimut isigisariaqarpagut. Mamakujunnut akitsuutip piivissorneqarnissaata qanorilioraluaruttaluunniit kingunerissavaa, Peqqinnissaqarfimmut passussinermut aningaasartuutit qaffannerat, peqqinnanngitsunik tuniniaaneq nerisaqarnerlu qaffassammata. Uani Demokraatiniit isumaqarpugut, aningaasat pitsaanerusumik atorineqarsinnaasut akitsuutit apparlugit peerluinnarlugilluunniit imaluunniit akileraarut appaavigalugu.

Tassa oqareernitsitut pingaarnarpaavoq uagutsinnut, innuttaasut aningaasaateqarnerulernissaat aammalu innuttaasut pisisinnaassusaasa qaffannissaat. Una Inatsisartunut ilaasortap Aqqalu C. Jerimiassen-ip innersuussutigaa, tamannalu ataqqivarput.

Paasivarput, Naalakkersuisut allannguutissatut siunnersuuteqarsimasut, naalakkersuisooqatigiit namminneq akileraartarnermut- aamma akitsuusiisarnermut aaqqissusseqqiinermik taasaattut, ilimanarluni, isumaqatiginninniutissaqanngitsugut, taannami amerlanerussuteqartunik tunulequtaqareemat. Allatut oqaatigalugu, IA aamma Siumut aalajangereersimapput taanna



aallaavigissallugu.

Taamaakkaluartorli Aningaasaqarnermut- aamma Akileraartarnermut ataatsimiititaliaq kajumissaarniarparput siunnersuut ilungersuullugu suliarissagaat, naapiffiqarsinnaasunik ujarlerlutik, mamakujuit akiisa appartinnissaannut qulakkeerinnissinnaasunik innuttaasut peqqissusaat innarlingikkaluarlugu.

Taamatut oqaaseqarluta siunnersuut aammalu Naalakkersuisut allannguutissatut siunnersuutaat Aningaasaqarnermut- aamma Akileraartarnermut ataatsimiititaliami suliareqqitassanngorlugu innersuupparput.